

摘藻堂四庫全書薈要

集部

欽定四庫全書薈要

集部

御選明詩卷七十九

詳校官原任主事
李斯咏



欽定四庫全書薈要卷一萬八千五百七十九

集部

御選明詩卷七十九

七言律詩十二

邊貢

萬壽節

綵仗淩風啟曙煙翠華含日俯晴川遙憐外閭稱觴地
恰是西江獻捷年顰錫共歡恩似海凱歌齊祝壽同天
微臣亦有迎鑾曲願奏君王玉几前



次韻送汪少宰閑齋進賀北上

皇居穆穆九關開有客乘槎萬里來宮月夜明鳩鵲觀
江雲秋繞鳳皇臺金魚待漏還通籍赤鳥凌空不染苔
珍重麥丘三祝意等閒休當祖筵杯

送丁考功秉憲之關中

鶯花如錦豸袍新建節西行及好春周禮職方分二陝
漢都形勝說三秦天浮紫氣函關動雨洗青蓮華嶽真
藻思還應有神助詩成先寄故鄉人

送鄒黃山考滿北上

駿聲華譽滿留都社稷蒼生望不孤
八座早登南執法三年兼考大司徒
風傳海甸鯨波息石固臺城鼠穴無
心是子年身范老遠從廊廟憶江湖

送胡中丞伯珩進賀上尊號表如京

羽旗芝蓋拂雲長鳳輿龍函入帝鄉
星近紫垣歸執法日明丹宸坐垂裳
元年繼統天無外大孝尊親國有章
朝下九衢人辟易尚看驄馬識威光

奉送少傅邃菴翁節制三秦

帝夢非熊起舊邦側思賢佐隱京江三邊羽檄來金殿
五色龍函到石淙范老甲兵胸有萬李侯才氣世無雙
臨戎制勝尋常事早見邊城築受降

三十年來四入關土人迎拜想開顏風雷晚送蛟龍雨
藜藿春藏虎豹山已遣北門歸鎖鑰更從鹵海弄潺湲
寥寥蜀相千年後伊呂誰當伯仲間

送都憲南屏高公赴鎮

遥承北闕絲綸詔近出南曹法從班龍劍倚空衝夜斗
豸袍迎日動春山國儲民業經營際淮水江流保障間
千里舳艫看利涉雲霄旌旆即須還

送顧明府之聊城

上春行縣出東疇桑葉萋萋喚乳鳩道左壺漿迎父老
雲中冠蓋識君侯魯連箭滅遺書在微子城荒故堞留
攬轡可應空弔古土風先為達宸旒

題桐鄉遺愛卷次屠尚書韻

一從明府出巖廊租吏三年不下鄉日出野田聞雉雉
雲移江館見鳬翔徵遷路入秦京遠撫字名歸漢吏良
遺愛古人誰得似羊公碑與召公棠

登嶽

玉皇祠畔一憑闌絕頂風高夏亦寒北去塵沙通瀚海
西來天地是長安青雲迴隔三千界白日平臨十八盤
似有飛仙度幽壑鳳笙聲裊珮珊珊

康海

華州張子梅花小酌

梅花亭上午陰涼
芍藥欄邊春晝長
霧鬢雲鬟何處女
羅衣金鈿坐來香
嬌歌欲遣行雲住
妙舞空疑乳燕狂
笑殺西溪能愛客
滿缸常釀鬱金漿

西園眺望

五月不來溪上遊
溪雲猶自伴溪流
雖非給事茱萸汴
絕勝郎官鸚鵡洲
半頃稻花迷浴鷺
萬株桑柳報新秋
何當更挈同心者
小酌微吟盡日留

王九思

無題

寂寞西風翡翠樓
黃昏斜抱玉箜篒
彩鸞影逐秦簫斷
紅葉心隨御水流
天外行雲難入夢
手中團扇易驚秋
愁來只恐嫦娥笑
明月疎簾不上鉤

十四夜月與李二獻吉飲

萬戶秋風碁枰哀
殊鄉今夕故人來
竹間涼露蕭蕭下
樓上浮煙細細迴
地僻柴門無過客
家貧樽酒有餘醅

疎簾碧簾須同醉明月青天為爾開

暮春即事

禁柳條長穀雨微輕寒猶自怯朝衣風光賣遍花聲歇
春色銜歸燕子飛曉闌排青山欲動露盆凝翠草初肥
不知萬斛紅塵外高興何人共浴沂

王廷相

約遊華嶽簡程道長質夫

華掌崢嶸紛紫翠蓮花十丈似蓬萊遊龍飛蕩滄溟水

翔鳳翻迴日月臺
帝側神仙方朔老
江南詞賦子山才
百靈搜盡風雷息
懷抱逢春亦好開

江村

日暖江村漾白沙
長干風景勝年華
野桃齊發迎春早
社燕初回度水斜
澤國帆檣依市井
蘋洲茅屋擬仙家
煙波忽漫中原望
渺渺歸心未有涯

朱應登

再過同官道中作

浮雲細細雨還晴客思車塵喜暫清
山館重來應識面
野花空好不知名
長林樹轉迴征蓋
遠戍煙消出候旌
日落興闌猶信馬
荒城夜火斷人行

夏日遊德山乾明寺

寺門高敞接層山
殿角低垂瞰碧灣
涼境自生祇樹底
塵心先墮翠微間
風搖朱實僧前落
路繞蒼崖鳥外攀
雲榻放叅仍假卧
暮天涼月未能還

起坐

窗含曉日尚熹微起坐從容意不違
寒菊抱花餘舊摘
慈鴉將子試新飛久知初服無羈束
始信浮名有是非
暫欲展書還棄擲閒心已習靜中機

登王孫亭望華嶽

華嶽遙瞻勢已雄
河流入望更無窮
羣山總出三峰下
衆水同歸九曲中
絕塞衣冠通上國
行人車馬入新豐
漢家陵邑依然在
擬賦西都恐未工

滄浪江

千尋鐵鎖貫長橋積翠浮天萬壑遙人向中流看砥柱
路從平地入名堯未論文教開荒服已見蕃王款聖朝
鳥語花明迎使節滄浪江上瘴全消

顧璘

寄許州七弟璵

千官扈從羨能文謫牧新聲天下聞落魄吾家蘓季子
風流南郡小馮君魚龍路怯黃河險鴻雁聲愁碧海分
莫上吹臺瞻越嶠五湖回首隔重雲

寄和趙戶曹叔鳴西寺遊矚

水香花氣鳳樓西宿雨初晴御苑泥
萬柳曉含蕭寺暗五雲春壓漢宮低
行經繡陌啼鶯滿迴望蒼郊遠樹齊
獨念江南愁病客竹窗斜月卧聞雞

宿雲開堂

難逢魏母彩鸞車聊試彌明石鼎茶
翠羽金文雲縹緲紫厓丹洞石嵒呀
五峰黛色消晴雪萬木靈暉散晚霞
願借雙公玄鶴羽月明騎上太清家

初出岳陽期登嶽有賦

浮湘未了嶽峰緣
夢寐煙霄二十年
問俗再遊荆楚路
乘風須到祝融巔
神馳滄海看紅日
路指朱陵上碧天
赤帝肯分賓友席
莫教雲雨暗山川

遊丘常侍山園

採芝深谷賦歸休
幸有鄰莊水竹幽
畫障日開山九疊
素封秋倚橘千頭
長懸片月延僧住
滿放閑雲伴客遊
桐葉已齊春去久
翻階紅藥為誰留

寄張司馬九月六日憶湘山寺舊遊

遙憶東山張太傅去年今日共離觴
清江畫舫愁中別落月楓林夢裏長
黃菊再逢非舊日白頭相見定何鄉
題詩欲寄衡陽去目斷西風旅雁行

陳沂

憶昔

紫宸朝退下青扉侍從花間過錦衣
金吐鳳皇香不發玉傾鸚鵡醉方歸
楹高甲帳雲霞色官冷牙牌冰雪輝

一自夢回天萬里長安空見塞鴻飛

王韋

春盡日

滿院楊花雨後稀綠陰清晝思依依
小園風暖櫻桃熟曲岸泥融燕子飛
北闕明時開王氣南山青處藹晴暉
眼前風景皆堪賞莫道韶光夜已歸

與衛南英玉圍爐

圍爐曾共訂幽期底事今年寒較遲
却喜草堂初雪後

更逢梅樹欲花時
鐘聲遠度啼鳥壘
燈影頻驚凍雀枝
細茗清薰供樂事
短吟長詠勝彈絲

西堂偶興

曲檻迴廊處處通
深深簾幕暗花叢
一春人醉斜陽裏
三月鶯啼細雨中
柳絮不飛黏草白
櫻桃初熟亞枝紅
門前若有求逋客
為說西堂夢未終

寄題劉東之園池

柱史園池萬竹斜
小羅山下岸烏紗
晚畦刈罷還抽葉

秋徑歸來未著花，不用平泉繁草樹。
誰言蓬海騰煙霞，平生賦詠多休暇。
更種東陵十畝瓜。

田汝霖

旅夜憶郁子南歸

月上高梧風露清，疎燈旅夜憶君行。
孤舟深傍蘆花宿，漁火潛依浦嶼明。
江上雁過鄉思劇，天涯人去夢魂驚。
含情無那江皋晚，愁聽寒更斷古城。

孫一元

山居著野服

道人占斷南屏景十里青山帶郭斜對水柴門通鶴渚
隔鄰煙火是漁家巖頭老檜占風雨石上昌陽閱歲華
妝點太平還我輩棕鞵桐帽送生涯

秋夜坐吳山僧舍

夕陰一抹暗江城入夜星河淺澹明度水煙寒千樹暝
隔林雲卧一僧清絡蟲故故催機杼木葉蕭蕭送雨聲
獨坐山窓情自慰燈花無那向人生

草堂

溪上高秋雲木涼地偏人事不相妨
開門江日流書幌
背水秋花照草堂
塹北買田時未就
舍南種竹已成行
幽居自擬王官谷
藥裏書籤引興長

范文一昆仲約余同汪進之方質夫汎舟西湖
雲移洲渚樹迴灣來泛湖光十里間
逸客風流同白幘
道人詩句說青山
天留晚景平波上
鷗落漁家亂竹間
此意與君須領略
菰蒲明月棹歌還

新築苔溪草堂成

白沙濯蓀淨江潭新築堂成映色寒旋有飛鳬臨釣石
即看浴鷺傍清湍扁舟此日鴟夷子木榻經年管幼安
長暇南鄰呼酒伴一尊相對坐林巒

鄭善夫

病起步西禪

一春伏枕鶯可憐病起野池明白蓮偶爾梳頭出城郭
便應看竹到西禪天晴求食鳥雙下日午閉門僧獨眠

明發螺江有行役紅塵白鳥異風煙

順門曉直

城上清鐘散御墀曙鴉聲動萬年枝
天迴閣道星辰迴雲捧乾清歲月遲
內省尚承東闕旨從官稀見早朝儀
羈孤愁斷周南日仙仗新傳到具茨

秋日病懷

南州落木晚蕭蕭薊野風煙萬里遙
病後客心惟藥物秋來人意滿雲霄
平沙雁帶三湘雨橫浦帆歸八月潮

搖落應歸楚公子不將舊業付漁樵

讀太初潯陽歌

青春寄我潯陽曲長路思君鸚鵡洲此日江湖須遠志
浮雲西北有高樓嵇康竟少神仙分尚子仍牽兒女憂
居洛何曾定縱跡終南渭水入鄉愁

後秋興二首

江湖霄漢不相聞獨拊龍泉看斗文燕雀豈知鴻鵠志
鳳麟終遁羽毛羣閉門春事生黃葉去國秋山長白雲

傳語元豐舊逸客好將王道輔明君

龍起襄陵漢水清風掀雲揭動神京一時卿相收者舊
萬國衣冠接聖明戀闕重懷和氏璧防身驚絕楚臣纓
致君堯舜羣公在短褐長鑱意自平

贈汪希周太府

憶並先朝戊巳年雪堂文酒日聯翩燕關舊侶嗟誰在
閩海浮槎羨汝賢鄉信風煙連楚粵宦情冠劒動山川
郡齋今夜虛懸榻何地看雲更黯然

呂柟

天津

天津城下水浮天
海口東來萬里煙
遙見帆檣雲外落
却疑日月鏡中懸
鶴巢不避波濤險
蜃閣常依島嶼連
愧是乘槎銀漢客
幾回吟望斗牛邊

毛伯溫

鄰霄臺和丁近齋

殊方久客情難遣
高閣同登意忽開
暹日高帆過西峽

霧雲古樹壓南臺沙村近帶農田出海岸遙看賈舶來
醉下虛亭尋古迹斷碑危碣半莓苔

周金

九日中山道中憶故園諸子

攬轡川原秋日晴岳蓮高並海雲生天涯佳節愁中過
塵世歸心夢裏驚懷李街頭船傍屋通吳門下水連城
登臨忽憶當時事落帽風流何限情

甲午二月七日再度紫荆關石門

兩峰高並一門通
曲徑斜盤紫翠叢
絕巘啼猿棲古樹
斷雲歸雁渺層空
荆榛不識春風面
壁壘空邀返照紅
歲晏旌旗今又到
漠南飛檄正匆匆

午日

天涯物候催佳節
岳嶺雲霞綰曙暉
風日漸於晴後好
音書何事別來稀
山齋翠竹仍含粉
江閣紅蓮未落衣
惆悵吳門五湖上
畫船簫鼓踏歌歸

秋日送客歸江南

故鄉此日多幽賞
家傍寒塘獨掩扉
野寺雲間僧有約
孤村楓落雁初飛
吟邊歲月空流水
夢裏關河半夕暉
一葉扁舟五湖上
葦花秋色轉霏微

韓邦靖

北上

萬木蕭蕭共別離
此行未敢卜歸期
還鄉夢怯關山遠
戀土情深花竹知
滿榻閒雲憐去後
半窓風雨憶當時
不知他日庭前鳥
還上空槐第幾枝

秋雨

雨到秋深易作霖
蕭蕭難會此時心
滴階響共蛩鳴切
入幕涼隨夜氣侵
江濶雁聲來渺渺
燈昏宮漏夜沉沉
蕭條最是荊州客
獨倚高樓一醉吟

送別周世寧

離亭落日照秋杯
愁共寒花各暫開
別去幾時還再見
交遊如子實多才
洞庭木葉秋仍下
巴峽猿聲今正哀
鴻雁南飛還北上
可能無意寄書迴

方鵬

西洲和時鳴韻

水雲深處卜幽棲，不減夔州舊瀼西。
寒雨渡頭孤艇沒，夕陽江上遠山低。
養馴白鴨當門浴，種就黃蘆與屋齊。
未識東山歌舞地，祇將尊酒對山妻。

留都將歸先呈朱齋

羞將白髮戀京華，已辦歸裝路不賒。
旋買鷄豚投里社，敢驅鵝鴨惱鄰家。
春風枕上聞啼鳥，秋水溪頭看泛槎。

莫道山翁無一事借書沽酒亦生涯

生日招遠林

勞勞六十又三年半在愁邊半客邊
假我餘生還對酒與人多忤合歸田
花前卧疾妨春事枕上敲詩失夜眠
此日江村期一醉淺沙深竹繫吳船

丙申新正試筆和舍弟韻

七十行年祇欠三清時無補自知慚
輕寒枕上慵朝起細雨尊前劇夜談
春意熙熙人自樂病懷黯黯我何堪

賣花聲在東風外紅白江梅共一擔

方鳳

閒居

自入春來日日閒柴門無客晝長關枕書榻傍階前樹
對酒窓開屋後山葉暗新枝花盡落泥添故壘燕初還
近來識得全生術不放愁催兩鬢斑

戴冠

遊胡少尹竹墅

十里江風吹竹林萬竿拂日座陰陰主人不惜玉壺淺
客子翻疑金谷深白晝水邊閒繫馬清秋花底下鳴禽
山翁醉後且歸去明日杖藜還復尋

方豪

尋王粲樓故址

仙子乘雲去不還空餘詞賦落人間高樓試問今何處
故老相傳是此山極目平原空悵望側身塵界欲飛攀
漳沮秋淨征鴻下越客悲吟鬢已斑

胡纘宗

太湖

即看鶴駕盤湖上擬有仙曹集洞中日月隔橋生碧海
星河當戶點瑤空天圍春樹千村合山漏秋濤十郡通
獨放扁舟領丹詔白雲深處問三公

傍海月生潮不上緣江路隔水還連兩山雲出東西樹
五夜星搖上下天洞口鱗鱗千頃玉水心晶晶萬家煙
鳥喧花發壺觴亂太守頽然醉欲仙

林屋洞

繫馬靈宮第幾天
紫霞丹竈坐羣仙
金庭空濶蛟龍鬪
玉柱玲瓏日月懸
改火欲烹山乳食
掃雲初藉石牀眠
隔凡不隔岳陽水
黃鶴飛飛何處邊

陪王侍御登虎丘次韻

清泉白石照吳門
駐馬停杯日未曛
塔影青圍江左樹
殿光紅映海東雲
靈池窈窕能留客
明月娟娟欲傍君
詩罷聞歌掃花坐
遷喬春鳥語初勤

雅州

征客愁看雲隱隱居人慣聽雨潺潺將軍列塞屯千騎
刺史分符控百蠻萬齒橫斜江上石四時層疊霧中山
人耕細竹寒煙外春在叢梅凍雪間

駱用卿

題韓信廟

逐鹿中原漢力微登壇頓感楚軍威足當躡後猶分土
心未猜時尚解衣畢竟封侯符蒯徹幾曾握手到陳豨

英魂漫灑荒山淚秋草長林久落暉

陸伸

四月五日遊淮雲寺儀上人限韻求題

得見支郎半醉中相將高閣詠南風
豈緣避暑追河朔自為傷春到灤東
說法竿頭慚未會談經注脚喜能同
昔慧琳嘗注孝經贊寧嘗陳說論語
而師方開門以儒書授童子故云
何年許入雲門社
辨取青鞵出軟紅

田惟祐

晚登城樓懷友

江城天暝夕陽微
拍拍輕鷗逐浪飛
水郭煙光迷野屋
海天風色上征衣
倚樓長笛家何在
出浦扁舟人未歸
愁絕知心成兩地
目隨征雁思依依

童寬

雨花臺

阿師何術隕天花
臺迴登臨望眼賒
百里晴山圍帝宅
六朝芳草入僧家
層層樹色寒煙合
歷歷車聲古道斜

鐵鎖銷沈龍戰後落潮處處咽江沙

楊慎

過南溪懷劉參之承之兄弟

京國交遊四十春劉家兄弟最情親
風流雲散三生夢水逝山藏一聚塵
沙步維舟催解纜鄰村聞笛倍沾巾
可憐煙草江安樹愁見當年送別津

贈永寧白參戎

貴竹新疆古蘭州分弓上將擁貔貅
笙歌城郭天無夜

耒耜郊原歲有秋
界首江青春洗馬
海漫山翠晚當樓
銳頭勲業君家事
四十登壇早拜侯

春興六首

遙岑樓上俯晴川
萬里登臨絕塞邊
碣石東浮三絳色
秀峯西合點蒼煙
天涯遊子懸雙淚
海畔孤臣謫九年
虛擬短衣隨李廣
漢家無事勒燕然

昆明初日五華臺
草長鶯啼花亂開
探禹穴遊今已遂
弔湘纍賦未須哀
巢雲獨鶴時時下
傍水羣鷗日日來

散地幸容高枕卧清朝豈乏濟川才

帝里朝辭供奉班客程宵濟洞庭灣湘靈鼓瑟清冷外
鮫女鳴機縹緲間青草波光連夢澤蒼梧雲物隔疑山
故園亦有岷江水垂老生涯釣艇閑

平沙落日大荒西獨立蒼茫意轉迷蕙畹蘭皋愁晚對
竹垣花掖記春棲催顏杜甫歌朱鳳憔悴王褒望碧雞
白首艱難隨去住青雲容易墜攀躋

天上風雲此際多山中日月竟如何爭傳鳴鳳巢阿閣

又見飛鴻出罽羅宣室鬼神思賈誼中原將帥用廉頗
難教遲暮從招隱擬把生涯學醉歌

白屋茅堂枕碧沙玄亭亦近子雲家浣花溪上花饒笑
濯錦江中錦勝霞遊女秉芳歌窈窕狂夫題竹醉橫斜
歸來瘴海凋霜鬢愁聽山樓咽暮笳

聽歌

彩雲天外駐行盃明月樓中引上才紅頰綻時銀燭爛
翠眉低處玉山頽飄飄俠客遊燕市窈窕仙娥下楚臺

千載王郎風韻在倩君重唱夕陽開

詠霧凇并序

甲寅歲秋冬久雨連月十一月廿六日甲子曉籠
霧微凇盖晴兆也俗諺云霜凇打霧凇貧兒備飯
瓮往歲在北方寒夜冰華著樹若絮日出飄滿庭
階尤為可愛曾南豐詩云園林日出靜無風霧凇
花開樹樹同記得集英深殿裏舞人齊插玉瓏鬆
又曰香銷一榻攢瑜暖月映千門霧凇寒韻書謂

之凍洛洛音索冰著樹如索也

怪得天雞誤曉光青腰玉女試銀妝瓊萼綴葉齊如剪
瑞樹開花冷不香月白詎迷三里霧雲黃先兆萬家箱
貧兒飯甕歌聲好六出何須賀謝莊

寄徐用先程以道

軒轅臺畔雪霜寒陰磧茫茫萬里寬夢繞盧龍明月易
書隨鴻雁朔風難天涯好在崔亭伯海上終還管幼安
應念瘴鄉孤戍者自將形影弔衰殘

次雲樓上公韻五月十九日魚池雅會

環衢窈窕錦亭東珍樹留春綴糝紅
鳥度屏風青嶂裏魚窺明鏡碧瀾中
賓筵鄴下詩篇盛軍次漁陽鼓角雄
獨有白頭虛授簡梁園應愧長卿工

郕縣子雲閣

落景登臨縣郭西坐來結構與雲齊
平郊遠訝行人小高閣迴看去鳥低
林表餘花春寂寂城隅纖草晚萋萋
酒闌却下危梯去猶為風煙惜解攜

中丞白泉汪公生辰值安南款報至

金湊銅柱貢函來
象渚龍編道路開
上將簡書回北極
中丞勛業冠南臺
擬將萬舞排家宴
欲取饒歌獻壽杯
節鉞可能淹袞寫
明年何地望三台

春夕潘園

雨砌風簷墮棟花
蟲書鳥字遍晴沙
春山載酒馳朝馬
江閣邀賓起暮鴉
陶令葛巾從滲漉
管寧紗帽任欹斜
殊方未覺追隨盡
韋曲風流更爾家

寄用貞弟

杜陵巴國苦寒行李白梁園昨夜情
山葉早梅心萬里雪窓風竹夢三更
河橋晨別南鳬影江漢春催北雁聲
回首長安當日下感時懷汝總難平

嘉陵江

嘉陵江水向西流亂石驚灘夜未休
巖畔蒼藤懸日月崖邊瑤草記春秋
板居未變先秦俗剝木猶疑太古舟
三十六程知遠近試憑高處望刀州

無題

石頭城畔莫愁家十五纖腰學浣紗堂下石榴堪繫馬
門前楊柳可藏鴉景陽妝罷金星出子夜歌殘壁月斜
肯信紫臺玄朔夜玉顏珠淚泣琵琶

與諸弟別樂菴弟約有江陽之會

中宵風雨早來涼謝草春池別夢長綠野開筵聯玉樹
紅亭離思結垂楊通波直下無千里明月何曾是兩鄉
白晝看雲何限意佳期良晤在江陽

泛蓮池晚歸

桂棹蘭舸泛碧漪
芰莢蓬蕩倒芳卮
十三雁足傳情徧
二八蛾眉度曲遲
玉樹風前人散後
金波水上月明時
良辰勝會應難續
風雨連宵惱別離

中秋禁中對月

漢家臺殿號明光
月滿秋高夜未央
銀箭金壺催漏水
仙音法曲獻霓裳
路車天遠鸞聲靜
宮扇風多雉影涼
千里可憐同此夕
美人迢遞隔西方

春夕聞雨坐至曉寄熊南沙

半夜風聲似水聲五更春雨徧春城
被堤芳草茸茸暗鏡渚天花灼灼
明牆過村醪仍凍蟻窓臨海樹已喧鶯
天涯節物催華髮同是懷鄉去國情

冬甲子晴江亭小集

晴意初從甲子回江亭更集暖寒盃
笑看裙帶憐芳草喜向釵梁見早梅
潘岳不勝金谷罰嵇康已覺玉山頽
石苔可踐城隅路細把青溪古句裁

懷歸

星橋南望沈犀渚雪嶺西連抱珥河關塞渺茫魂夢隔
山川迢遞別離多汀洲春雨寡芳杜茅屋秋風帶女蘿
心事未從詹尹卜生涯聊聽輦童歌

李君偕過臯橋新居言別

沙門草閣對漁舟坐俯昆池萬里流蕭索暮塗猶浪迹
登臨暇日豈銷憂阮公失路誰青眼江令還家尚黑頭
行見羣英滿青瑣寧忘一老在滄洲

張崇象新居

碧山學士居茅屋錦里先生過草堂
森森龍池接溝水啾啾雀樹隱鄰牆
何人問字能携酒有子攤書解滿牀
巴曲肯來收下里楚歌還擬和滄浪

費寀

贈彭高惠州倉使高多髯善談

掀髯論事了非難
雖伏休嗟滯羽翰
彭祖術傳知不老
惠州飯好且加餐
才堪會計官何忝
地少逢迎夢亦安

猶有風流曾解否梅花清絕荔枝丹

長至齋居和荅太常盛程齋少常胡九峰

郭外千峰列畫屏捲簾相對坐虛庭凍痕尚覺孤梅瘦
秋色猶餘萬竹青簾護燭花寒不動棋驚鶴夢夜頻醒
輕瓷茗飲清何極羽客敲冰貯玉瓶

王以旂

九日登長城關樓

邊塞高登百尺樓遙天極目迴消愁穹廬遠向西番徙

烽火無勞內地憂
四野牛羊隨處牧
千家禾黍滿場收
喜看安阜叨清宴
醉倚黃花插白頭

屠僑

江頭晚步

薄晚江行意若何
夕陽微影漏林柯
綠厓白鳥沙痕淺
隔岸青山塔影多
下網人聽潮外語
入村船載渡頭歌
觀瀾不用登遐絕
百里蛟門送海波

郝鳳升

無題

來去渾疑雲雨蹤
楚王宮北數聲鐘
情當厚處翻成怨
淚到乾時不覺濃
煙縷湘裙飛蛺蝶
玉屏羅幕墮芙蓉
月中剩有森森桂
遮却清光第幾重

游璉

興田道中

興田驛路人家遶
煙火依稀出遠山
蔗圃秧分疎雨外
茶煙人語亂雲間
半生戀闕心空赤
五馬之官鬢欲斑

獨坐肩輿懷正惡武夷遙望一開顏

齊之鸞

將至苻平

長塗秋暮馬駢駢風起城高雉堞微蟬到夕陽聲更急
樹經寒露葉初飛正聞老母平安信兼喜中丞克捷威
揚策不知行色倦欲沽村釀解朝衣

赤木裏口墩下坐憩

赤木空濛翠接天懸車路杪下烽煙須驅虎北馮金塔

更走龍南跨玉泉青草谷中兼得水白雲巖下盡堪田
奔馳庶竭涓埃報心苦三陟版輶前

宿三城寺

寺僻陰陰轉夕陽藤蘿小徑涉微茫瀕江水鳥歸投樹
過竹林蟬噪切牀秋已三旬猶苦熱郡違十里自成鄉
年來服習山中靜直北神京路許長

周廷用

經廣武城

廣武城邊草樹青
濁河波浪畫冥冥
天呼垓下真龍起
事異鴻溝白馬刑
日晚沙場留返照
秋風燐火亂殘星
英雄自古功無敵
阮籍狂言未可聽

孫繼芳

嵩明次韻

海畔青山山上城
野橋村巷接昆明
峰開林木千章秀
水抱沙田十頃平
蠻井夜深人未定
炎州霜後瘴還生
飄飄萬里西南路
莫採芙蓉愴獨行

新添次韻

仙源沂盡水西頭欲採汀花賦遠遊巖徑曲盤千嶂入
野橋斜度一溪流明星擁旆連宵發暗雨回車信宿留
望斷遙空征雁沒片雲何處是江州

徐咸

石首蓬萊閣

蓬萊高閣臨清漢閣下風濤日夕撞花日映紅明霽野
草煙浮綠翳晴牕雕闌遠挹荆南勝玉笛新開洞府腔

悵望謫仙何處去娟娟秋月照澄江

林大輅

蔣子雲都水定居西長安門外

南泠三載賦閒居春日長安近卜廬苑樹飛煙分客榻
禁鐘浮月散朝車楊雄天祿多奇字方朔金門有諫書
相望西橋應不遠莫教風雨往來疎

李濂

無題二首

芙蓉為面玉為肌當日君王恨見遲十二樓臺留兔魄
三千粉黛妬蛾眉行雲易散高唐觀落葉難平太液池
擬辦黃金求作賦長門心事長卿知

為雨為雲恨幾重楚臺何處覓仙蹤開簾悔入雙雙燕
伏枕愁看六六峰謾唱迴風彫木葉且將團扇畫芙蓉
曹騰甫作西樓夢惱殺層城五夜鐘

當朝

當朝藝苑爛天葩前輩風流擅大家詩律總推高太史

文章誰繼宋金華未能雲夢吞千頃謾說圖書誦五車
臨渚自慚才思澁幾時重夢華生花

擬唐人送宮人入道二首

苦憶仙人萼綠華乞身遙入太清家向來寫恨餘紅葉
此去行蹤有碧霞學道晚依新藥竈洗妝朝棄舊菱花
玉笙不作昭陽調緜嶺閒吹月影斜

蚤承丹詔入華清却戴黃冠出漢京簫譜好傳秦弄玉
鍊師初拜許飛瓊衣沾別島朝霞色夢斷長門夜雨聲

十二層樓何處所
芙蓉花外是仙城

秋懷

閨年秋盡水城寒
積雨瀟瀟澤菊殘
五夜霜嚴迴朔氣
萬家砧急趁江湍
登樓興減難成賦
報國才微合掛冠
向晚關河悲落葉
仰天鴻鵠羨高翰

黯黯江潭楓樹林
異時屈宋並傷心
蕭森合入將歸辨
顛顚猶傳既放吟
今古歲時供涕淚
水天樓閣倦登臨
浪為楚客焉能賦
腸斷寒城日暮砧

城南題壁

一自歸來茹紫芝每逢野老話襟期
中林結舍雲光抱別墅看花酒具隨
學稼祗緣餬口累拋書纔是息心時
行歌剩有古今思瑟瑟晚風吹鬢絲

春興

老興逢春興轉饒無端白髮任飄蕭
山中有客傳丹訣月下何人弄玉簫
滿眼風煙驕蛺蝶一枝天地足鷺鷥
野晴臺寺花爭發緩步長吟續楚騷

嵩渚先生麋鹿姿早春樂事許誰知晴遊杏塢詩成捷
夜醉榆村酒散遲身世一鋤聊半飽江湖雙鬢未全絲
逢人不解藏蹤跡笑贈山中五色芝

夏日閒居雜興

鳥下庭蕪柳覆廬幽居閒况邇何如飽餐麥飯奚干祿
穩卧藤牀勝讀書白髮懶尋詹尹卜青天思執化人祛
晚風忽動逍遙興爛漫花村過小車

夏日城南別業訓林都憲湘南見寄

碧椒結子亂鳴蟬五月村居思窅然青壠歲華流水外
白頭心事落花前松齋夜拉高僧話竹簟涼宜醉客眠
對月懷君江渚上遙知飛閣俯湘川

送李濟之令泰和

為避緇塵染繡衣羈棲灞沔日相依深春幾伴看花醉
小艇時陪泛月歸潘岳詞章仍出宰匡衡心事已多違
廬山彭蠡曾遊地莫滯雙鳬入漢畿

送王都閫之廣西

帝簡鄖襄節制雄嶺南專閩氣如虹
調弓玉斧皆廷賜
燕頷虬髯有父風
桂水瘴消飛檄外
梧山氛淨凱歌中
麒麟峻閣雲霄待
蚤樹平蠻第一功

解官歸汴初度日作

此日偏驚白髮新
當筵楚舞酒行頻
碧山有伴還成社
銀漢無梁莫問津
種柳醉翁書甲子
紉蘭騷客賦庚寅
情知鏡裏流年換
聊復酣歌汴水春

蔣山卿

夏日田居即事四首

草堂聊藉竹為門
花塢從將槿作垣
長日鳥啼紅藥盡
夕陽人坐綠陰繁
愁多非為逢時歎
住久應知隔世喧
賴有青山如舊故
年年相對兩忘言

偶携藜杖過橋東
曲港潮流處處通
溪上閒花多覆水
村前垂柳半含風
黃昏鳥宿輕煙外
青野人耕細雨中
莫怪移家來畝畝
欲將遺事學龐公

水榭風亭取次開
新涼應有客同杯
樹陰深處黃鸝語

溪水平時白鳥來
葵扇偶從鄰嫗買
荷衣旋學野人裁
花間蝴蝶雙飛去
正是山翁午夢回

雨過苔荒石徑微
林園一向掩柴扉
柳堤潮滿魚苗上
麥隴風晴雉子飛
花暝更教移晚酌
竹深猶遣著寒衣
老人本自心無事
不為投閒始息機

戊申正月初宿休園

江村物候又驚新
月色花香併換春
自笑無能惟野性
孰知有味是閒身
茅簷遲日偏宜懶
竹院風清不受塵

終日閉門常謝客只應酒伴得相親

贈別孫刑部還京次衡山韻

早因休沐出承明又見彈冠上帝京
芳草五湖初放棹華林三月細啼鶯
浮雲莫歎當時事零雨還傳舊日名
二十年前題漢柱為君飛動不勝情

薛蕙

雨中遊翠微山

亭午翠微山半路下看山底翠雲生
客來準擬山中宿

雨至何妨洞裏行
隔竹泉聲初浙瀝
傍巖花樹轉分明
題詩携酒兩殊絕
翻怪風煙報晚晴

題張子醇西峰草堂

山人卜築城西郭
日日西山爽氣來
細雨濛濛丹磴濕
晴雲裊裊翠屏開
堦前蔓草穿書閣
石上松陰覆奕臺
況有春湖可乘興
他時須作泛舟回

訪孫世其叙飲

苑內銀河垂裊裊
城邊暗月上微微
不辭懷抱今宵盡

無奈賓朋此地稀
萬里飄零同卧病
三年邂逅一沾衣
燕山楚水遥相望
目斷天涯鴻雁飛

春陰

春陰日日春晴少
料得春晴春已歸
竹裏雄鳩嗔獨語
池邊乳燕喜羣飛
炊煙冷落侵寒食
簷溜飄蕭上袂衣
寂寂小軒賓客散
祇餘禪榻不相違

人日

暉暉晴日透簾帷
冉冉和風颺鬢絲
野老自傾田舍酒

故人誰寄草堂詩
即看梅柳春舍早
預想鶯花景不遲
旋鬻園蔬辦家釀
剩拚酩酊艷陽時

睡起

午夢初醒卯酒消
不知風雪已終朝
客來小閣聊盤礴
鳥散空園轉寂寥
老境時時懷故舊
窮途事事愧漁樵
古人堅卧非無意
未必淵明為折腰

顧璫

清明效白體

四序無如春最好一春最好是清明海棠欲放留鶯語
楊柳初齊趁馬行風定鞦韆時自動月高絃管夜還鳴
老來減盡少年興對酒當歌尚有情

劉天民

渭南道中用韻荅黃汝厓方伯

隴水秦關道路均春風花柳著行新烏巾斜日久折角
白酒誰家堪入唇晚歲始醒蝴蝶夢故園今返鹿麋身
天涯尺牘勞相問猶是漁磯舊友人

林春澤

昌平懷古

秋早邊城無伏暑
夜深庭樹起涼風
月明烏鵲羈棲地
天迴關山感慨中
抗疏深悲劉諫議
荒村猶祀狄梁公
年光荏苒身岑寂
聊采蘋花慰轉蓬

舟下揚子江

咄咄南登江上臺
江頭日暮使人哀
曾聞嶺海多遷客
未見風塵終棄才
返照斷虹收雨去
夜潮隨月度江來

燕雲薊樹三千里天末孤臣首重迴

登天華山

函谷青牛歲月寒小華惆悵白雲殘香鑪畫省空回首
旅鬢秋霜未掛冠何處珮環風外響他年龍虎鼎中蟠
便携五嶽盧敖杖玉宇高凭最上闌

楊銓

曉發

耿耿星河拂曙流舳艫銜尾上邕州牂牁南下摧鯨室

陽谷東開破蜃樓山頂漸排雲影出浪花初盪日光浮
捷書夜報降王款應有元戎侈壯猷

舒芬

九日游烏石倡和


轉壁迴巒一徑深直窮烏石最高岑為將佳節酬孤興
應被旁人識壯心山勢北來雲萬疊潮頭東望雪千尋
揮毫欲掃煙嵐淨風雨今朝未許侵

八月菊

禁中有菊先秋吐誰謂陽春此地私為把幽香慰知己
未妨明月是佳期肯隨風雨催詩句怕共茱萸醉酒卮
人事却須殊物理行藏珍重敢違時



御選明詩卷七十九



總校官庶吉士臣侍朝

校對官編修臣莫瞻菴

謄錄監生臣和其聲

欽定四庫全書薈要

集部

御選明詩卷

八十一

詳校官原任主事臣李斯咏



欽定四庫全書薈要卷一萬八千五百八十

集部

御選明詩卷八十

七言律詩十三

夏言

雪夜召詣高玄殿

迎和門外據雕鞍
玉竦橋頭度石闌
琪樹瓊林春色靜
瑤臺銀闕夜光寒
爐香縹緲高玄殿
宮燭熒煌太乙壇
白首豈期天上景
朱衣仍得雪中看

象麓草堂初成

水碧沙明洲渚迴，籬深竹靜草堂開。
風吹山木蕭蕭下，日落江帆片片來。
有客相過時載酒，主人無事日登臺。
愁看直北關山迥，白草黃雲秋正哀。

次合溪

黃茅僻塢竹雞啼，駐馬孤城落日西。
山郭暝煙還遠近，野田流水自高低。
畫樓直倚青蘿壁，粉堞遙連碧草堤。
把燭空庭嗔列炬，柏臺驚起夜烏栖。

石龍書院次韻題黃久菴卷

湖水青青映石龍
青山合起紫霄宮
林藏嶽麓千峰雨
瀑引匡廬萬壑風
何許子猷來剡曲
幾年諸葛卧隆中
平生夢想天台路
歲晚相尋黃次公

蔡經

蘭河曉渡

月落金城鼓角殘
危闕曉色拂雕鞍
黃河渺渺中原隔
紫塞迢迢邊地寒
西望旌旗連瀚海
東來風雪滿皋蘭

萍蹤萬里休惆悵虎節龍沙亦壯觀

秋江晚望

沙頭雲樹鬱依依晚稻吹香紫蟹肥
露白秋江鷗一夢月明寒樹鴈雙歸
蓬窗剪燭孤彈劍草屋禁風靜掩扉
滄海十年空短鬢青山未返薜蘿衣

許宗魯

春日園居雨中作

南山雲霧暗長安坐惜芳菲欲向闌
海燕歸遲春色暮

谷鶯愁劇雨聲寒柔添柳線垂金水濕重花梢壓繡欄
安得東風開暖霽曲江走馬恣游觀

登河山樓

近郭危樓俯碧湍倦遊孤客倚朱闌淮淝山色尊前出
吳楚江流畫裏看旅思逢秋增短鬢鄉心隨鴈過長安
黃花白酒登高日玉笛金笳起暮寒

宣風館作家書後用壁間陽明先生韻

雲外微紅見燒痕道邊寒水入溪渾此時日落楚山館

後夜月明何處村已近閉關猶道路偶逢傳札念晨昏
獨燒官燭看妻子卧聽郵更驚夢魂

胡侍

扈駕郊壇陪祀

朱壇晴雪媚春空雲從天行氣象雄八駿宛回黃竹路
六龍遙向玉華宮爐煙半拂仙人掌樹色微翻少女風
應有海神來候駕南端非霧碧冥濛

林希元

丁酉除夕有感

牢落天涯兩歲除，夢中曾幾賦歸與。
聖朝未有寬恩詔，邊郡猶勞判事書。
忙裏不知殘臘去，客邊惟覺二毛疎。
椒盤此夜誰觴酒，忽憶家鄉萬里餘。

李士允

送皇甫氏謫黃州

直道如君復遠流，十年天上少同游。
聖恩信是過文帝，遷客猶來得楚州。
弔古有時尋赤壁，采芳終日對滄洲。

那堪遲暮翻為別
木落江寒望去舟

曹嘉

寺前秋泛

湖上晴遊即鏡中
輕煙淡靄靜浮空
岸迴舟自薰葭入
塔迴雲從殿閣通
驚吹魚龍時出沒
傍簷鷗鷺晚西東
鳴橈更泛桃花水
不辨秋林返照紅

王廷陳

病起

經旬伏枕豔陽天病起藤蘿繞屋懸
少日親交魂夢裏
一春花鳥泪痕邊緣溪力薄依人步
課圃情多警豎眠
天遣此生無俗累書籤藥裏任年年

夏日宴集宋寶山別墅留贈

先生堪擬葛天民築室郊原遠市塵
客款閒門驚稚子
自分餘酌到農人朱華冒日明棋局
翠竹含風撼角巾
不覩少微雲霧裏楚江誰信有垂綸

病後答友人

一畝居連郢客鄉三年愁隔漢川長青山各有幽棲志
白雪遙傳寡和章自傍雲霞開藥圃不將塵土灑荷裳
洞庭雪後煙波闊花底乘舟到草堂

馬汝驥

九月一日登彌勒閣

旅病經秋愧玉簪強登樓閣帝城陰雲高白鴈邊聲急
露冷黃花歲色侵燕甸南來平野闊秦天西去大河深
憑軒極目懷吾土日暮棲遲動越吟

王謳

立春後一日寄京中諸友

紫禁寒多未見花
萬年枝上散啼鴉
樓銜內制螭頭出
殿轉宮車雉尾斜
寶鼎畫熏香篆合
畫屏春簇漏聲賒
笙歌猶自迎王母
青鳥蟠桃共歲華

汪應軫

望田家

數椽茅屋傍山開
橫麓平簷雪滿堆
耳畔春風還料峭

田家錢鏹尚塵埃雞豚詫客穿籬入牛馬馴人際晚回
何事鄰翁喧笑語為儲舊穀接新來

王鳳靈

送林遷于得告還山

祖席初分酒半酡相看無奈故人何生憎柳色臨歧路
况聽春聲入櫂歌舊國雲山何處是他年風雨憶君多
祇緣簪組能相絆未得相從訪薜蘿

陸金

宿京口驛

風帆如馬過維揚
滿目煙花路渺茫
江上潮痕收暮雨
渡頭人影立斜陽
十年季子裘應敝
三月王孫草正芳
今夜月明京口驛
計程應喜近家鄉

楊士雲

春事龍關作

春事今過二月中
登山載酒喜相同
三點兩點社公雨
十番五番花信風
子規啼血欲半夜
胡蝶掠香時一叢

醉餘白石高歌調日落水流西復東

朱豹

秋日遣懷

雲物蕭條僧舍荒砌封蒼蘚半迴廊坐來草樹俱搖落
望入關山更渺茫憂國淚邊秋色老思家夢裏雨聲長
臨風却羨天涯鴈去啄江南晚稻香

寄程以道

隴梅隄柳又春風客子光陰似轉蓬此日天涯千里隔

昔年花底一尊同
西川蹤跡孤雲外
南浦離愁細雨中
早晚瞿塘新水發
雙魚煩爾下巴東

張治

懷貞齋少詹

雲樹荒涼對石城
重來非復舊詩盟
折梅東閣春相憶
伐木空山鳥自鳴
江海蛟龍波浪闊
省堂風雨夢魂驚
瑤琴獨抱朱絃冷
何處樓臺看月明

九日登觀象臺歸飲憑虛閣

象緯丹梯凌絕巘雞鳴高閣俯憑虛古今人世登臨外
百二山河覽眺餘九日天涯催節序萬峰秋色落郊墟
綠樽醉把黃花看烏帽愁驚白髮疎

送南城李知事憲之惠州

天涯霜雪貂裘黑古道重雲野樹愁作客風塵皆萬里
送君江海獨孤舟青巾舊說蘇南海白髮今傳李惠州
幕府官閒詩興好定須飽飯對羅浮

徐州次陳水部韻

古道遙連河上開
賢豪陳迹半蒿萊
山青雨歇斷虹出
江濶夜深明月來
萃墨孤亭還細草
歌風千古但高臺
綠雲自鎖雲龍色
無復山人放鶴回

梅園秋游

燕門九月天
雨霜瘦馬城西衝
曉涼曲岸傍橋蘆
葉短斷畦臨水
稻花香鷺池清淺
移舟入鳥樹蒼茫
載酒嘗不有主人
知愛客可能垂釣
對斜陽

道場紀事

黃髮真人戴玉冠身騎金虎佩蒼鸞俯窺日月行丹極
貪禮星辰拜石壇旂影一庭仙掌淨鐘聲萬戶綵雲寒
朝元初罷千官下碧宇沉沉夜未闌

李默

松亭夜集書感

松長新枝竹倍濃盡從去後託春風
亭開野徑寒雲外人坐疎林落照中
丘壑敢論吾志在釣游猶憶少時同
引杯燒燭今何夕欲話離心月滿空

黃佐

雪後早朝

北風吹雪淨芳塵
雪霽千門麗景新
丹地祇聞鳴玉步
碧天疑有散花人
寒光掩映龍樓曉
遲日薰成鳳沼春
歸向柳邊凝立久
試裁已曲和韶鈞

送顧少參進表之京

殊方長走畫熊車
薇閣松窗月色虛
喜見西山歸戰馬
愁聞南海進明珠
風生閭闔陳金鏡
雲擁采恩拜玉除

後夜君逢牛斗使前星應有鳳皇書

秋穫喜晴

農事初成樂事繁即看雲水接平原巾車道上黃迷壟
社鼓聲中綠滿尊十里斷霞明鴈鷺半牀斜照散雞豚
豐年有願緣憂國擊壤今聞到處村

秋夜卧疾

西風瑟瑟到芙蓉寒入瓊樓十二重極浦雲煙連朔鴈
滿城砧杵間疎鐘閨中思婦歌秋扇塞上征人望夕烽

何事文園正消渴金盤空有露華濃

李浙

送沈太守仲弟還普安

孤琴匹馬入三湘却慰元方憶季方春草池塘時落夢
客窗風雨夜連牀不妨旅食彈馮鋏遮莫腰圍笑沈郎
歸去定應親友訝擔頭何事只空囊

送丘懋之道長按蜀

曉泛星河八月槎望回巴蜀未全賒天涯萍梗元非客

王事勤勞豈顧家
度峽行旌開曙景
倚雲長劍拂霜華
錦城春色今何似
猶恐桑麻間野花

倫以諒

舟中夜坐寄弟白山穗石

秦淮煙月蔣山雲
回首金陵隔紫氛
別浦停橈渾不寐
孤城吹笛詎堪聞
春來花看同鄉樹
嶺外鴻歸逐舊羣
何事人生獨惆悵
百年歧路幾回分

謝貴

白沙月下感懷

野曠霜空萬木凋，歲寒孤櫂傍清宵。
江聲永夜驚虛枕，月色中天上遠潮。
千里風煙勞夢想，十年心跡愧漁樵。
白沙翠竹情無奈，玉宇瓊樓望轉遙。

浦瑾

閒居漫興

草堂幽事許誰分，石鼎茶煙隔戶聞。
長日如年雙燕睡，晴風似酒百花醺。
軟莎新步青絲履，濃墨閒書白練裙。

稍待溪南荷芰滿扁舟十里看紅雲

雨熟枇杷樹樹香綠陰如水畫生涼客疎却喜階苔厚
身懶初便簾竹光陽羨紫茶團小月吳江白苧剪輕霜
投壺散帙還隨意消得人閒白日長

此身閒外復何求長日安居事事幽隔竹敲茶妨鶴夢
臨池洗墨戲魚浮風牽翠帶翻階草雨濕紅綃落海榴
散盡飛蟲生晚色月明已上水東頭

南里橋東一草堂烏皮隱几竹方牀池萍漲雨青浮岸

鄰樹分陰綠過牆乳燕出時炊麥熟繭蛾飛後曝絲香
不知何處炎蒸在日日清風灑葛裳

張含

春日邨居閒作

庭草初齊巷柳斜暖風晴旭野人家山中夢破尋蕉鹿
杯裏弓疑避酒蛇碁局交情空點檢機關世道重吁嗟
閒隨白晝馴階鳥歸數黃昏卜樹鴉

除夕次用修韻

新歲重賡往歲詩壯心寥落憶南陲東風消息誰先得
客子光陰我自知芳草已迴迎步處梅花又滿斷腸枝
明朝莫負城西約踏遍郊原問酒旗

無題

維摩丈室散花回公子華筵向晚開錦里詞華薛洪度
秦川歌舞趙陽臺頽雲官髻籠香界纖月城睂照玉盃
舞罷羅裳小垂手一枝豔蕊薄寒催

己亥秋月寄升菴

金馬秋風十載餘芙蓉深巷閉門居登樓莫作依劉賦
奉使曾傳諭蜀書卧病可憐天一柱獨醒無奈楚三閭
北來消息風塵動白首滄江學釣魚

吳天祐

和荅同年徐豐厓

勞生會晤豈易得別十五年方一來故人幾人道相合
今夕何夕尊同開感君情深愈於舊使我樂極翻成哀
天空月明耿長夜梧葉蕭蕭飛露臺

顧彥夫

和詠梅

官閣梅花冷亦開
主家故暖賞春盃
憑誰寄與人千里
許我來看日幾回
竹外一枝風灑落
琴中三弄思徘徊
如何不入靈均賦
自古山林有逸材

張縉

詠芭蕉

長葉翩翩綠玉叢
植來況是近梧桐
美人閒立秋風裏

羈客孤眠夜雨中情逐舞鸞偏
易感事隨夢鹿渺難窮
太湖石畔新涼院何處吹簫月滿空

朱疏

舟曉

鷓鴣將雛護石根莓苔綴纜雜衣痕
幾椽茅屋生春色
無數桃花燒野邨祈歲鄉儺簫鼓咽
坐風舟子笑歌喧
蓬牕興劇誰憐汝喚取青峰映綠尊

陶成

寄朱存仁

別來心事不堪聞
細雨孤燈獨念君
短髮漸看添亂雪
此身寧得化歸雲
東風楊柳題歌扇
夜雨琵琶醉舞裙
幾度江干空買櫂
未知日到淮濱

文徵明

和石田落花詩十首

錄三首

桃蹊李徑綠成叢
春事飄零付落紅
不恨佳人難再得
綠知色相本來空
舞筵意態飛飛燕
禪榻情懷裊裊風

蝶使蜂媒都懶慢一番無味夕陽中

飛如有戀墮無聲曲砌斜臺看得盈細草栖香朱點染
晴絲撩片玉輕明江風飄泊明妃淚綠葉差池杜牧情
賴是主人能愛惜不曾緣客埽柴荆

情知芳事去還來眼底飄飄自可哀春漲平添棄脂水
曉寒思築避風臺霑衣成陣看非雨點徑能勻襯有苔
穠綠已無藏豔處笑他蜂蝶尚徘徊

聞砧

明滅疎燈鑒薄帷誰家搥練夜遲遲驚回短夢千門月
不斷秋風萬里思歲晚江城還自急天寒閨閣最先知
高樓人靜星河爛正是霜華欲下時

歲暮齋居即事

檐樹扶疎帶亂鴉蕭齋只似野人家紙窗獵獵風生竹
土盎浮浮火宿茶日色射雲時弄彩雨絲吹雪不成花
庭中卉物凋零盡獨有蒼松領歲華

十月

江南十月乍風埃，簾箔垂寒晝不開。
身計蕭蕭存斷簡，人情黯黯付深杯。
雨中秋事芙蓉盡，霜後時新橘柚來。
抱病經旬賓客減，卧看香鼎篆縈迴。

清明日陳淳過訪

愁病春來次第加，清明寂寞類僧家。
留人野飯新挑菜，乞火鄰牆旋煮茶。
晴日檐楹楊柳色，微風簾幙海棠花。
故人念我能相過，不遣良辰負物華。

夏日雨後書事

卷八十
瓦溜初停旭日高苔花暈碧草齊腰一番濃綠催朱夏
昨夜新波失斷橋積雨情懷渾欲病乍暄衣著最難調
西齋睡起都無事時有幽禽破寂寥

雪夜鄭太吉送惠山泉

有客遙分第二泉分明身在惠山前兩年不挹松風面
百里初回雪夜船青籊小壺冰共裹寒燈新茗月同煎
洛陽空說曾馳傳未必緘來味尚全

是夜酌泉試宜興吳大本所寄茶

醉思雪乳不能眠
活火沙餅夜自煎
白絹旋開陽羨月
竹符新調惠山泉
地爐殘雪貧陶穀
破屋清風病玉川
莫道年來塵滿腹
小窗寒夢已醒然

二月望汎舟出江邨橋抵上沙登天平飲白雲

亭

舟行欲盡有人家
記得橫橋是上沙
南望風煙隨鳥沒
西來墟落帶山斜
暖催新綠初歸柳
水映酣紅忽見花
殘酒未醒春困劇
汲溪聊試雨前茶

郭西閒汎

雨足新蒲長碧芽
野塘十里抱村斜
青春語燕窺游舫
白日流雲漾淺沙
湖上修眉遠山色
風前薄面小桃花
老翁負笈歸何處
深樹雞鳴有隱家

月夜登閭門西虹橋與子重同賦

白霧浮空去渺然
西虹橋上月初圓
帶城燈火千家市
極目帆檣萬里船
人語不分塵似海
夜寒初重水生煙
平生無限登臨興
都落風闌露楫前

陳道復見和再答

匡牀竹几僅容身靜對何曾有雜賓最愛短牆堪映雪
自裁新帖寫宜春閉門敢遂稱高士得酒還能作主人
珍重梅枝偏會意夜深和月照清貧

夏意

五月江南櫻筍殘疎花吹盡綠漫漫雨來恰及梅黃候
春去猶餘麥秀寒白日幽深茅屋靜野情蕭散苧袍寬
美人何處經時別滿耳新蟬獨倚闌

上巳日獨行溪上有懷九達

郭外青煙柳帶柔
洞庭西去水悠悠
故人不見沙棠楫
燕子齊飛杜若洲
日落晚風吹宿酒
天寒江草喚新愁
佳期寂寞春如許
辜負山花插滿頭

同王履約過道復東堂時雨後牡丹狼籍存葉
底一花感而賦詩

推脫塵緣意緒佳
衝泥先到故人家
春來未負樽前笑
雨後猶餘葉底花
矮紙凝霜供小草
淺甌炊雪試新茶

憑君莫話蹉跎事
綠樹黃鸝有歲華

新秋

江城秋色淨堪憐
翠柳鳴蜩鎖斷煙
南國新涼歌白苧
西湖夜雨落紅蓮
美人寂寞空愁暮
華髮凋零不待年
莫去倚闌添悵望
夕陽多在小樓前

夏日閒居

門巷幽深白日長
清風時灑玉蘭堂
粉牆樹色交深夏
羽扇茶甌共晚涼
病起經時疎筆硯
晏居終日懶衣裳

偶然無事成媿情不是栖遲與世忘

翰林齋宿

春星爛漫燭薇垣獨擁青綾向夜闌
宮漏隔花銀箭永蓮燈垂燼玉堂寒
坐聆宵拆霜圍屋想見郊裡月滿壇
鈴索無風塵土遠始知仙署逼金鑾

內直有感

天上樓臺白玉堂白頭來作祕書郎
退朝每傍花枝入倖直遙聞刻漏長
鈴索蕭閒青瑣靜詞頭爛漫紫泥香

野人不識瀛洲樂清夢依然在故鄉

雨中放朝出左掖

霏微芳潤浥霓旌歷落彤墀散履聲
暝色浮煙迷左掖
碧雲將雨近西清柳垂青瑣千絲重
水落銀橋萬玉鳴
霑灑不辭袍袖濕天街塵淨馬蹄輕

除夕

撥盡爐灰夜欲晨不知飄泊潞河濱
燈花自照還家夢
道路誰憐去國人浩蕩江湖容白髮
蹉跎舟楫待青春

只應免逐雞聲起無復鳴珂候紫宸

憶昔次陳魯南韻

三年端笏侍明光
潦倒爭看白髮郎
咫尺常依天北極
分番曾直殿東廊
紫泥浥露封題濕
寶墨含風賜扇香
記得退朝歸院靜
微吟行過藥闌旁

春歸

三月春光積漸微
不須風雨也應歸
與人又作經年別
回首空驚昨夢非
江燕引雛芳草滿
林鶯出谷杏花稀

沈郎別有傷情地不為題詩減帶圍

新夏

暖風庭院草生香晴日簾櫳燕子忙
白髮不嫌春事去綠陰自喜夏堂涼
閑心對酒從時換老倦拋書覺晝長
客有相過同一笑竹爐吹火試旗槍

春日齋居漫興

西齋酒醒篆煙殘手汲新泉破月團
芳草池塘春入夢綠陰簾幙晝生寒
由來中散裁書懶老去淵明束帶難

却笑閒緣除未得每從人覓異書看

暮春

南風十日捲塵沙吹落牆根幾樹花
老怯麥秋猶擁褐
病逢穀雨喜分茶
庭陰寂歷梧桐轉
簾影差池燕子斜
不是地偏車馬絕
市喧不到野人家

林花落盡意蕭然
舊喜圖書病亦捐
宛轉閒愁如蔓草
蹉跎春事到啼鵑
紫空淑氣遊絲困
亭午清陰碧樹圓
怪底叩門都不應
北窗無事正高眠

夏日睡起

綠陰如水夏堂涼
翠簟含風午夢長
老去自於閑有得
困來每與客相忘
松窗試筆端溪滑
石鼎烹雲顧渚香
一鳥不鳴心境寂
此身真不愧羲皇

虎丘登閣

老去淵明益羨閑
興來高閣漫躋攀
半檐爽氣尊前雨
百里平林掌上山
天際輕雲寒未散
日斜飛鳥倦知還
長安塵土三千丈
不到清泉白石間

雪後

寒日晶晶曉溜聲中庭快雪一宵晴牆西老樹太骨立
牕裏幽人殊眼明想見漁蓑無限好怪來詩思不勝清
江南殘臘相將盡會看門前春水生

春日遊支硎天平諸山

麥隴風微燕子斜雨晴雲日麗江沙遙尋支遁煙中寺
初見天平道上花過眼溪山勞應接方春草樹發光華
夕陽半嶺歸興急慚愧城中自有家

夏日同次明履仁治平寺納涼

竹根雨過石苔斑
鐘梵蕭然晝掩關
坐愛微涼生碧殿
忽看飛雨失青山
雲分暝色來天外
風捲湖聲落樹間
最是晚晴堪眺詠
夕陽橫抹蓼花灣

致仕出京言懷

白髮蕭疎老秘書
倦遊零落病相如
三年漫索長安米
一日歸乘下澤車
坐對西山朝氣爽
夢回東壁夜窗虛
玉蘭堂下秋風早
翠竹黃花不負余

蔡羽

見杏花懷吳下門生

偶拈如意話天涯不道春風到杏花朝雨似迎新燕子
江村稀見野人家忙中寒食三年客雪後音書兩鬢華
豈是草玄耽寂寞欲將文字問侯芭

由南峰入天池

入谷也須緣磴道乘高忽又度虛岑參差石勢雲行細
寂寞禪關樹鎖深春日綺羅偏映水江南櫻筍自成林

十年不到天池寺南北峰頭費遠尋

上巳寄文子徵仲

楊柳成絲二月殘闔閭城外路漫漫空餘夜月琴中語
添得年華鏡裏看送客汀洲蘆筍綠倚樓風雨杏花寒
故人東閣多情思獨詠蘭亭興未闌

玉河橋曉行

太液新波出建章輓轡聲近想宮牆殘星拂樹天橋淨
隔岸啼鶯禁籞長紫氣凝香開北極蒼龍乘日起東方

君王垂拱臨朝早銀燭光中散鷺行

初春南城

綠靄遙生竹裏厨山光難得上衣裾
籃輿出郭清溪暖茶竈投僧碧館虛
雲石細尋泉湧處松杉常似雪消初
仙人餽得金壺汁說法堂高好漫書

立秋日客去與啓之靜坐

蟬噪乘涼江雨輕芙蓉沼上陰生東
家樹影屏間綠北澗泉聲雲外清
屐齒乍臨驚夢破苔痕新長與階平

漢庭侍從今虛曠不是文園懶送迎

別寓館

郎官宅裏舊簾櫳鶯燕頻來認主翁
霜月寄情淮水上煙花迷客秣陵東
梁園倦後思家切角里閒多卜館同
松菊未荒誰為理先將栽灌教兒童

湯珍

待衡山先生過園居

朝來檐雀送聲忙見說高人過草堂
風動似聞門外履

晝長頻續案頭香暖烘韶麗花含笑雨閣輕陰日弄光
多少野橋東望意碧雲閒詠小山旁

錢子孔周卧疴不出奉簡律句

束髮相要及暮年追陪花月與林泉却緣伏枕違春事
自笑無情拍酒船煉骨舊傳禽戲術全身新讀馬蹄篇
高軒列榭多雲氣日盼庭柯芳樹前

晚思

禪居日日對僧伽暗裏流年度物華碧澗雲來生晚翠

青槐風過落輕花
人閑自愛孤峰靜
江近猶憐尺鯉賒
心事有期途路遠
可因流落賦懷沙

長安門西道苑牆雨後經眺作

紫宮皇屋邃森沉
馳道周廬肅羽林
樹裏啼鶯清禁切
雨餘流水御溝深
松篁並落鍾山翠
雲霧常依漢殿陰
此日歌謳歡在鎬
草茅何以嗣華音

泊徐州再宿對月作

風煙漠漠路漫漫
迢遞偏嗟作客難
茂苑音書千里隔

彭城月色兩宵看
星涵河影垂平野
水觸洪聲瀉急灘
更倚五雲瞻北斗
清輝玉宇不勝寒

陳鐸

春晚過程竹溪用韻

春日春盤薦白魚
地幽全勝野人居
詩篇靜閱新晴後
茶臼閒敲午夢餘
花落語鶯還在樹
竹深流水細通渠
將軍莫厭過從數
幾日東橋有報書

春日喜程大祥見過

金石交情老不移尊前重覩舊丰儀清風竹徑臨茶竈
細雨鄰牆見酒旗世事且歸胡蝶夢春情多寄海棠枝
西齋兩月無清興病起逢君一賦詩

次與仲和聯句韻

卧病經年喜遇君草堂清話到斜曛濁醪拚取尊前醉
險韻何妨席上分冷雨小蛩鳴切切輕風殘葉下紛紛
也知別後還相憶何處鐘聲隔暮雲

謝承舉

送任正字遊天台

蜀人

西風十月下瞿塘萬里隨身劍在囊詩艇又橫揚子水
糟丘已築浣花莊夢中家國心猶炯客裏湖山鬢未蒼
明日扶藜上天姥石梁東去是仙鄉

宿和州港

落日舟航泊晚晴酒帘茅屋小村清客途南去三千里
鄉土今來第一程野廟鼓鐘驚夢寐秋江星斗動虛明
西風轉盼情無限行役勞勞恨此生

抵豫章

藩鎮西南此壯哉鐵圍城郭面江開山川依舊滕王閣
草樹消沉孺子臺燈火夜喧漁父出帆檣日送買人來
千年文獻吾鄉土兩度經過愧不才

不寐枕上憶劉子

殘漏疎鐘枕上驚雞聲何處未分明空梁有月秋將晚
客舍無燈夜亦清風雨屢孤同榻興萍蓬難忘盍簪情
布衣展轉寒如水多少思君夢不成

雪霽發煙茫渡

野屋寒雞凍不鳴，滿天風雪五更晴。
波吞朔氣滄江迴，日射冰華翠壁明。
囊篋衣裳憐久敝，雲霄羽翼念孤征。
還家算及新春候，浙水吳山次第行。

游甘露寺夜歸即景

南指岡巒路幾重，短藜拄到翠芙蓉。
地從海口橫諸水，山自江心落半峰。
孤月出林驚玉兔，一星當閣對蒼龍。
十年再舉憑高眼，吟倚門前四五松。

次韻吳至大寄胡汝舟時客嶺南

水冷天寒憶送君，扁舟艤凍雪溪紛。
青慳岸柳春工淺，白入江梅歲事分。
燈火篷牕頻夢雨，煙嵐綵筆幾停雲。
蠻鄉眠食應知慎，莫放檳榔似酒醺。

病中憶清風亭海棠

絳衣仙子馭青鸞，飛下仙家白玉壇。
翠黛不禁秋睡困，粉香猶怯曉妝寒。
雲生綵樹愁成寐，月滿珠簾病憶看。
嬌豔正防風露重，紫絲不惜護朱闌。

揚州馬次甫見過病中以詩道意

三百江城一日風又從橋口繫孤篷
忽驚深巷來佳客不厭閒門問病翁
舊事多傷春鬢白好詩留剪夜燈紅
階前便即呼兒拜眼底誰人識馬融

西野應胡汝舟求

背郭林幽帶曲岡自成村曠自成莊
十千酒好邀新月五字詩工送夕陽
閉戶秋聲驚倦枕捲簾爽氣入虛堂
孟郊只隔前山路日日奚童簡牘忙

宿姚氏延秀山房兼候王原享不至

何處平泉別有莊
新從西崦築溪堂
水風吹酒涼侵枕
山月窺人影到牀
睡熟黃紬詩夢遠
坐消紅燭世機忘
多情摩詰應趨約
誰貌騎驢華子岡

飲黃氏園

春色休論郭外尋
城中泉石此山林
對花宜醉十分酒
買地不辭千笏金
雲幕穠薰脂粉豔
風簾低約珮環音
主人多少留春意
未許池塘變綠陰

金鑾

除夕

還憶去年辭白下却憐今夕在黃州
空江積雪添雙鬢細雨疎燈共一樓
世難久拚魚鴈絕家貧常為稻粱謀
歸來故舊多凋喪愁對東風感壯遊

北河道中

叢臺北向通燕谷曲渚西流繞薊門
歸鳥亂啼原上樹夕陽多照水邊邨
因悲俗吏趨三輔曾有新詩寄陸渾

歲歲別來春又暮
幾回芳草怨王孫

泊孟城驛簡仲輞莊

孟城驛口射陽西
水國風煙似五溪
萬井落花春後發
幾家垂柳雨中齊
時臨野店炊晨黍
漸入荒村報午雞
見說輞川多勝事
經過原許一相攜

重過歌臺追憶髯仙竹谿二徐老

山公曾醉習家池
潦倒當年舊接離
再過已驚非故主
相逢元不是新知
屏花帶雨春還麗
水檻臨風晚更宜

幾度壚頭覓嵇阮紫簫攜向月中吹

感燕

故園門巷近烏衣但見花開燕子飛
一自天涯與相別
可憐春盡未知歸
綠楊庭院傳聲杳
芳草池塘顧影稀
何處修梁更堪寄
日斜江上倍依依

邢參

寄玄敬

函丈論文十載餘
暫違接席笑慵疎
要知泉石蒙題品

漫遣緘封候起居滿座賓朋應貰酒一樓燈火想離書
新春未肯經郭郭孤負蓬門日埽除

王寵

夏日草堂撤去窗戶肆設几簟清風洞越藤竹
交蔭悠然有作

錦石疎花暑氣清翠巖丹壑夏雲生已添海燕梁間語
直看湖帆鏡裏行四壁驚風絃索響千林修竹簟紋明
令人却憶王車騎更覺西山爽氣橫

橫山下種瓜作

山田犂确苦多沙，學種東陵五色瓜。
激澗即看穿石竹，插籬偏自愛藤花。
囊中未得餐霞法，溪上時留泛海槎。
長日輟耕無一事，只須牛角挂南華。

張詩

崔西峨山中別起樓臺寄贈

山人習靜謝氛埃，甲第遙從天上開。
流水自然成澗壑，閒雲終日護樓臺。
珠簾度鶴窺金篆，碧月穿花送玉杯。

鞭石不勞蓬海去吹簫時引鳳皇來

鄭作

送吳克存還山

花暮春回柳復飛青山千里送君歸
共傾北地愁中酒獨酌南溪水上磯
帆挂夕陽孤影淡鴈迷殘雨去聲微
孤城此日腸堪斷不為臨歧重濕衣

高澌

岳陽樓

已陵城上岳陽樓樓外長江日夜流殘雨數峰衡岳曉
暮雲孤月洞庭秋仙人夜奏沙邊笛估客春移樹杪舟
十二危闌閒極目滿汀楊柳不勝愁

傳汝舟

同諸子秋夕尋雲谷晦翁讀書臺

看山午發澄溪澣度嶺鐘鳴日已曛百里川原平入眺
九霄星斗倒垂文短袍席映疎林月高枕牕含疊嶂雲
欲訪遺祠悲草木早衰真愧道無聞

錢元善

春日感懷

春風三月景依然
弱柳游絲觸處牽
家遠隔年無信到
官閒鎮日枕書眠
林鳩逐婦晴還雨
沙燕將雛去復旋
遙憶故園春更好
江樓背郭看鉏田

戚韶

春日江上

江晴燕子故飛飛
江上春帆何處歸
南浦久懷芹菜美

北山初獻巖苗肥心驚醉語常多悔事到中年漸覺非
明日舞雩須一往二三童子試春衣

趙金

郊居

自愛閒居卜近郊獨將心迹寄衡茅桃花水泛魚吹浪
芹草泥香燕補巢雜植桑麻供國稅細分杞菊入山肴
平生方外誰為友冷澹雲霞信可交

陳鑑

西邨諸社友見訪雨夜分得微字

門外泥深草路微
滿江風雨暗斜暉
春潮正急不可渡
有酒相邀且莫歸
屋帽田衣留竹桁
茶煙藥火共柴扉
重招更有茶蘼帖
爛醉花前願豈違

徐鱗

寓妙隱菴

東風仙苑鬪芳菲
家在雲林屢夢歸
河畔草青鶯欲語
城南花滿蝶初飛
寒生古院偏多雨
苔沒空階正掩扉

留戀曲池春更好垂楊終日鎖煙霏

雲陽道中

雲陽郭外曉氤氲飛鞚連翩正逐羣天際楚山春易靄
雲中江樹曙難分鄉心更值風花暮旅跡頻驚陌草薰
欲向隴頭聊駐馬啼鶯深處不堪聞

叔貽卧病家園以詩代訊

聞君抱病謝塵蹤歸卧鄉園綠嶼中水曲更憐藏別島
花深偏愛隱房櫳仙芝出地俱成餌琪樹為林半是叢

最憶夜分紅燭靜珠簾垂處月朧朧

送陸甥綬適淮陰

征帆渺渺去江濱千里垂楊暗綠津
乳燕不堪臨別酒落花偏自送離人
淮陰尚說王孫市楚水空流故國春
荒戍角聲愁暮起夕陽時節易霑巾

王元逢

對酒

抱病逢春亦暫歡芳時對客更加餐
即看乳燕雙雙入

無那飛花片片殘
潦倒不忘桃葉句
蕭閒應戀竹皮冠
莫論往昔清狂事
且醉荒亭苜蓿盤

王磐

同友人泛湖

細柳新蒲綠未齊
樓船春泛五湖西
帆檣影裏魚爭躍
簫鼓聲中鳥雜啼
宿雨暗添山色重
晴雲輕度水容低
人家只在風煙外
面面天開罨畫溪

元宵漫興

天風吹散赤城霞，散落人間作九華。
夾路星球留去馬，燒空火樹亂歸鴉。
笙歌醉月家家酒，簾幙窺春處處花。
一派雲韶天外迴，不知仙馭過誰家。

木公恕

春居玉山院

玉嶽峻嶒映雪堂，年年有約賞春光。
飛紅舞翠秋千院，擊鼓鳴鈺蹴鞠場。
遲日醉聽羣鳥哢，暖風時送百花香。
好山好地堪為樂，莫厭尊前累盡觴。

許陞

張舜卿園亭

綠陰深巷寂無譁
小結茅亭玩物華
花散餘香來客座
竹分新翠過鄰家
錦袍垂手閒調鶴
烏帽籠頭自煮茶
况值承平常偃武
不妨詩酒作生涯

送梅

爛漫南枝與北枝
殘香落落影離離
多情明月還相照
無賴狂風且莫吹
縱飲不辭今日醉
算開猶是隔年期

最憐今夜黃昏後寂寞微吟倚樹時

御選明詩卷八十